



## 山海城市

臺灣是一個海洋島嶼的國家，四箍輾轉攏是海。基隆倚佇臺灣頭，一個天然的港口，三面山一面海的地勢，一個有山有海的山海城市。

這個山海城市數百年來幾若擺的戰爭，差一屑仔就予人踏做平地。佳哉！人講：「拍斷手骨，顛倒勇。」先民勇敢的精神，喺齒根咬牢咧，無予個拍倒去。一擺閣一擺倚起來，重新建立家園。一粒一粒青 ling-ling 的山，猶原倚騰騰竝佇遐，予人做岫閣開枝散葉，代代生炭。海水流過來閣流過去，溢過來閣溢過去，港口的船隻嘛全款出出入入，替這個山海城市創造濟濟的商機。

俗語講：「靠山食山，靠海食海。」基隆人真少靠山咧種作來生活，三面山反倒轉是基隆交通無法度發展上大的阻礙。一面海晟養濟濟的基隆人佇遮拍拚，有一半較加攏是靠碼頭港口佇咧趁食。遮的行業有船員、報關人員、碼頭苦力、運輸業者等等。因為個日常生活的需要，閣帶來食、穿、行、踮相關行業的發展。遮的各行各業恰這個山海城市的關係，就像咱人的皮牢肉、肉牢皮全款，這個關係是削袂用的。

「海水會當養飼萬物」，有海水咧流的所在就袂餓死。佇遮除了靠碼頭港口趁食，討海是上原始的趁食行業。像講八斗仔漁村，當地的人攏是靠掠魚維持生活的討海人。海洋豐富的資源，對遮的討海人來講就像掘袂盡的寶藏全款。這陣人就是靠闊莽莽的大海佇咧生活。

山海城市上嬌的是一片靠山，一片倚海的山海景緻。一家伙仔抑是三、五个仔親朋戚友，紮一寡點心，泡一鉗仔茶米茶，抑是苦 tèh-tèh 歹落喉閣干干仔愛啉的咖啡，坐佇涼亭仔來哈兩杯仔，會使講是人生上大的享受。佇遐毋管你是牛聲馬喉，抑是破銅管仔聲，嘛無人會嫌你噪耳，無人會報警察來取締。看海湧起起落落，聽世界上大團的樂隊演奏天然的名曲，規年迴天二四小時無歇睏的表演，免錢喔！歡迎逐家來親近這個山海城市。

作者：紀春綢

### ☆詞彙學習☆

【竝】tshāi：豎立。

【岫】siū：禽獸蟲鳥的巢穴。

【晟養】tshiann-ióng：養育。

【拍拚】pah-piann：賣力工作。

【趁食】thàn-tsiáh：討生活。賺錢過活，比喻營生。

【用】lut：脫落。

【討海】thó-hái：靠出海捕魚來維持生計。

【闊莽莽】khuah-bóng-bóng：形容非常遼闊，一望無垠。

【干干仔】kan-kan-á：偏偏。

【牛聲馬喉】gû-siann-bé-âu：大聲吆喝。

【噪耳】tshò-hīnn/tshò-hī：讓人聽了難受。

【哈】ha：喝，特別指喝熱茶。